

Tuesday, February 25, 2025

Time - 2:30pm - 2:35pm

AKASHVANI AIZAWL
REGIONAL NEWS BULLETIN
(MIDDAY)



FINANCE COMMISSION

16th Finance Commission member ten vawiin khan Zoram Medical College & Hospital, Falkawn-a mi chu an tlawh a, hetah hian Health & Family Welfare Minister Pi Lalrinpuui leh Secretary Pi Sangchhin Chinzah bakah ZMCH hotuten an lo dawngsawng a, ZMCH hmasawwna tur hrang hrang an sawi ho.

ZMCH Academic Block a Council Roomah inkawmhona ah hian Director Dr John Zohmingthanga'n presentation pe in ZMCH lo indin tan dan atanga an thlen chin te leh hmasawwna tur la awm leh an mamawh chi hrang hrangte tarlangin, Health Minister Pi Lalrinpuui pawhin 16th Finance Commission chungah beiseina sang tak an neih thu a sawi a, ZMCH bakah Health & Family Welfare Department kaihnawih thil pawimawh tak tak an hnena an thlente chu Mizoram hmasawwna atana pawimawh ber berte an nih avanga ngaih pawimawh sak tur leh a tihhlawhtlin dan kawng ngaihtuahsak turin a ngen bawk a ni.

16th Finance Commission member te hian ZMCH fang kualin OPD, Laboratory leh Department hrang hrang an tlawh a, ZMCH hotute pawhin an dinhmun leh hmasawn theihna tur la awm ang angte a hmunah an hrilfiah a ni.

ZMCH an tlawh hnu hian 16th Finance Commission memberte chuan Falkawn Bharat Nirman Rajeev Gandhi Sewa Kendra Hall-ah Falkawn Village Council hotute an kawm a, hetah hian 16th Finance Commission Chairman Dr. Arvind Panagariya chuan hovin LAD Director Pu Chauhnuna leh Falkawn Village Council member ten an lo dawngsawng a ni.

Falkawn Village Council hotute chuan Mizorama Village Council 800 chuang awm zingah an hun chep tak kara tlawh tura anni an rawn thlang chu Commission chungah an lawmthu an sawi a, Village Council inrelbawlna kalphungte sawifiahin an lo tawnhriat tawh atangin Mizoram pum huapa Village Councilte mamawh leh hmasawnna tur bakah hmalak dan thar tur atana tha ni a an hriatte 16th Finance Commission hnenah hian an thlen a, sawihona hun tha takin an hmang bawk a ni.



NATIONAL SEMINAR ON PACKAGING

Vawiin khan National Seminar on Packaging, Export Promotion and Digital Marketing chu vawiin khan Aijal Club ah neih niin hetah hian Mizorama thlai tharchhuah hrang hrang sawngbawl dan leh hmasawnna hrang hrang sawiho a ni.

Branch Micro Small and Medium Enterprises (MSME) buatsaih vawiina hun hmanah hian Commerce & Industries Department Director Pi Maria CT Zuali chuan Mizorama thlai thar chhuah te leh an siam chhuah tam tak chu pack na mumal an nei lo a ti a, Nimbu sawr chhuah chu bur dang ah thun in zawrh ani mai thin tih sawiin food processing lama hmasawn tur chuan thangthar thiamna sang tak tak nei, hmunpui zawk dawr thiam an ngai a ti a, Mizorama thlai thar chhuah chu pack-na tha a awm loh avangin la thawrchhuah theih a ni lo a, Mizoramah chuan lakluh lam hawi zela a la kal avangin hlawkna an la tel thei rihlo tih a sawi.

National Seminar ah hian mi 150 chuang tel in, helam a mi thiam bik te leh Self Help Group hrang hrang, MSME entrepreneur-te leh Mizoram University Student te an tel a. He hun ah hian Indian Institute of Packaging Government e-Marketplace (GeM)-a mi thiam leh helam a mithiam bik ten kalkhawm te chu training an pe nghal bawk a ni.




MAMIT WALKATHON

Tukin khan Mizoram Health Systems Strengthening Project leh Senior Chief Medical Officer Office hnuaiah “Damna Kawl Eng Community Intervention” buatsaihin ke a kal runpui Mamit Charkawn leh PWD kawn atangin neih a ni a, Mamit Field ah intawhkhawm a ni.

He hunah hian District Bawrhsap Pu K. Laltlawmlova chuan Mizoram District zingah taksa hriselna atana ke a kal runpui ti hlawhtling tura mipui lo pen chhuak te chungah lawmthu a sawi a, taksa hriselna vawn that anih loh avangin Zunthlum, BP sang leh natna dang laka fihlim tura kalkhawmte sawmin, District chhung mipuite chu hriselna kawnga ke pen zel turin a sawm bawk a ni.

Dr.Lalhlunpuii, Sr. CMO pawhin thusawiin Mizoram Health Systems Strengthening Project (MHSSP) te chuan Health Department hnuaiah hriselna kawnga hmalakna hrang hrang an kalpui tan thu a sawi a, damdawiin tihchangtlun, hmanraw mamawh leh mipui pan phaka hriselna kalpui a nih theih nan Laboratory tihchangtlunte chu an hnathawh langsar zing a mi a nih thu a sawi bawk.

Tukina ke kal runpui hi Mamit Charkawn atanga kalte hi Pu K.Laltlawmlova District Bawrhsap chuan a vailiam a, PWD kawn Mamit a tangin mipui thahnem takte'n kawng hi an rawn zawh bawk a, kawng zawhtute hi an vaiin mi 1000 vel an ni.



ARMY CHIEF

France tlawha cham mek Chief of Army Staff General Upendra Dwivedi chuan vawiin khan French Army Chief General Pierre Schill a kawm. Sipai lal pahnihte hian ram pahnih ten ralthuam lama an thawhdunna te sawidunin hun lo kal zel tura sipaiten inzawmna tha an neih theih dan tur an sawi hoa. Khawvel remna muanna chungchang leh venhimna lam te an sawidun a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.

